

鄱陽縣志卷之十四

武事 附武功義勇

鄱毗連揚荆帶江漢自史記書吳伐楚取番後為厯代用武地或乘險要割據或芟平草竊或膺重寄戡撫兼葳跡其成敗失得咸可鏡或謂鄱士多文宜武功不競焉然觀梅銷教戰督軍湖江春敗陳友諒康郎山何其壯也至林楚袁審之徒或蹟等驅除或義保鄉里雖不無瑕瑜殊衷時論事皆備考焉

周

敬王十五年吳伐楚取番楚恐去郢北徙都都 史記楚世家

鄱陽縣志

卷之十四

武事

一

顯王三十五年楚威王滅越取番 綱鑑

秦

始皇二十六年庚辰遣尉屠濰將兵十萬分駐童湖錦族

湖民思亂 府志

二世帝二年 癸巳 鄱陽令吳芮使英布將其兵擊秦 綱目

按漢書列傳吳芮秦時番令也甚得江湖間民心號曰番君黥布六人也見番君以女妻之

三年 甲午 沛公還攻胡陽遇番君別將梅銷與偕降析酈

史記高祖本紀

漢



高帝十二年丙午十月高祖已擊布軍會甄布走令別將

追之拜沛侯劉濞為吳王漢別將擊布軍洮水南北皆

大破之追得斬布鄱陽高祖本紀

按史記黥布傳布破楚一軍其二軍散走遂西與上兵

遇蘄西會甄布軍敗走布故與番君婚長沙成王使人

給布偽與王誘走越故信而隨之鄱陽鄱陽人殺布茲

鄉民田舍

武帝建元六年丙午使鄱陽令唐蒙風曉南粵漢書閩粵王傳

元鼎七年秋東越王餘善發兵距漢道號將軍騶力等為

吞漢將軍入白沙武林梅嶺殺三校尉索隱曰按今豫章北二百里接

鄱陽縣志 卷之十四 武事 二

鄱陽界地名白沙有小水入湖曰白沙沙東南八十里  
有武陽亭亭東南三十里地名武林此白沙武林今當  
閩越之京道按此注志雖收而究不得其處然以此接  
番界推之則當在番江之南岸今地猶有白溪沙港其  
即白溪故處乎宋以前芝山驛道實達於彼則與閩越  
京道亦合而餘干有武林塘于所謂東南八十里三十  
里者雖不盡合亦頗近之疑即武林也但今所謂白溪  
沙港僻在湖塹驛路久廢遂無復過而問者四史勦說

獻帝建安三年鄱陽民帥別立宗部

四年冬十一月韓當從孫策征劉勲討黃祖還平鄱陽吳志

八年權西伐黃祖破其舟軍惟城未克山寇復動還過豫

章使呂範平鄱陽程普討樂安太史慈領海昏吳志

呂範傳征江夏還定鄱陽策薨

二十一年丙申鄱陽民尤突受曹公印綬率民去吳賀齊



與陸遜討破突斬首數十餘黨震服吳書賀齊傳

三國

漢後主建興四年吳黃武五年十二月吳鄱陽賊彭綺反通鑑

按周魴傳黃武中鄱陽大帥彭綺作亂攻沒屬城乃以魴為鄱陽太守與胡綜戮力遂生擒綺送武昌

六年吳黃武七年夏五月鄱陽太守周魴偽叛誘魏將曹休三國志

十四年吳嘉禾五年冬十月鄱陽賊彭旦為亂吳主傳

十五年吳嘉禾六年中郎將周祗乞于鄱陽召募事下問陸遜

以為此郡民易動難安不可與召恐致賊寇祗固陳取

鄱陽縣志 卷之十四 武事 三

之郡民吳遽等果作賊殺祗攻沒諸縣陸遜傳

延熙二十年建安鄱陽新都三郡山民作亂以鍾離牧為監軍使者討平之鍾離傳

晉

成帝咸和三年戊子春正月蘇峻反嶠屯溇陽遣鄱陽內

史紀瞻等率舟師赴難温嶠傳

安帝元興三年甲辰鄱陽太守温放之率兵拒桓元

義熙六年庚戌春正月盧循寇南康廬陵豫章陷之江州

刺史庾悅以鄱陽太守虞邱進為前驅屢破循兵進據

豫章絕循糧道通鑑紀事



按虞邱進傳進除鄱陽太守統馬步十八隊于東道出鄱陽至五畝嶠盧循遣將吳糾為上饒令又遣童敏之為鄱陽太守據郡進從餘干步道趨鄱陽敏之退走追破之

齊

海陵王延興元年秋九月宣城公鸞殺鄱陽王鏘等七人

通鑑

梁

武帝大同元年乙卯冬十二月鄱陽鮮于琮反內史陸襄

討平之豫章書

按陸襄傳大通七年為鄱陽內史先是郡人鮮于琮修道法常入山採藥拾得五色幡旄又于地中得石璽竊怪之琮先與妻別室望琮所處常有異氣益以為神遂結門徒殺廣晉令王筠號上願元年署置官屬其黨轉

鄱陽縣志

卷之十四

武事

四

相誑惑有眾萬餘人將攻郡襄先率人修城隍為備及賊至破之生獲琮

太清二年

戊辰

秋八月鄱陽王範密啓侯景謀反不報冬

十月侯景襲譙執刺史豐城侯泰

按韋榮傳鄱陽王範自合肥遣西豫州刺史裴之高與其世子嗣帥江西眾赴都屯張公洲以待上流諸軍卒與榮軍合

簡文帝大寶元年春正月梁始興太守陳霸先進軍南康

邵陵王綸自鄱陽進至九江引兵西上假黃鉞都督承

制討侯景

豫章書

二年春二月陳霸先討李仕遷殺之秋七月于慶自鄱陽

還豫章侯瑱拒之走江州

南史



梁末海寧縣歙及鄱陽宣城多盜近縣苦之

陳

文帝天嘉六年乙酉遣都督程靈洗自鄱陽別道擊周廸

破之廸與麾下十餘人竄山谷中後遣人潛出臨川市

魚鮭臨川太守駱牙誘而斬之豫章書

隋

文帝開皇九年己酉春正月滅陳王世積至豫章告諭諸

郡鄱陽守將詣世積降隋書

十年庚戌冬十一月樂安蔡道人饒州吳世華皆自稱大

都督詔上柱國越國公楊素討之文帝紀

鄱陽縣志

卷之十四

武事

五

煬帝大業三年丁卯鄱陽民相殺掠郡守梁文謙檄巡官

劉宗宏招安乃定

十二年丙子冬十二月鄱陽林士宏稱楚帝據江南綱目

按江西大志冬十月鄱陽賊帥操師乞自稱元興王建

元始興攻陷豫章郡以其鄉人林士宏為大將軍侍御

史劉子翊討之師乞中流矢死士宏代之

按煬帝本紀鄱陽賊操天成舉兵反自號元興王建元始興攻陷豫章郡唐書林士宏傳則云隋季與鄉人操師乞起為盜師乞自號元興王建元天成據豫章蓋隋紀誤以名號為名而大志亦未覈僭元之實也通志跋原

十二年劉權為南海太守行至鄱陽盜起詔權討之隋書



十三年鄱陽人董景珍以郡反迎蕭銑于羅縣號為梁王  
北史

全年冬十二月蕭銑取豫章林士宏退保餘干  
綱目

唐

高祖武德五年 壬午 冬十月楚王林士宏卒其眾遂散  
綱目

按士宏傳宏弟鄱陽王藥師以兵二萬圍循州總管王  
世略破斬之士宏請降王戎亦獻南昌地詔戎為南昌  
州總管士宏復遁保安山袁人相聚應之為張善安所  
察以兵赴討會士宏死黨乃解

太宗貞觀十八年 甲辰 秋七月上將征高麗勅將作大監

鄱陽縣志

卷之十四

武事

六

閻立德等詣洪饒江三州造船四百艘以載軍糧  
豫章書

中宗嗣聖六年 己丑武后 夏四月太后殺鄱陽公誼等十

二人  
綱目

按豫章書誼謀迎中宗於廬陵故誅

肅宗至德二年 丁酉 春二月江南採訪使李成式討永王

璘璘敗與高仙琦奔鄱陽司馬陶備閉城璘怒焚城門

以入收其庫兵掠餘干  
永王璘傳

僖宗乾符五年 戊戌 春二月黃巢陷虔吉饒信等州  
通鑑

按唐紀云二月王仙芝伏誅其將王重隱陷饒州刺史  
顏標死之



六年已亥黃巢掠饒信等十五州眾至二十萬通鑑

廣明元年庚子正月淮南將張潏及黃巢戰于大雲倉敗

之四月潏克饒州帝紀

按豫章書張潏擊賊帥王重霸降之屢破黃巢軍巢退保饒州別駕常宏以其眾數萬降潏攻饒州克之巢走信州遇疾疫卒徒多死潏急擊之巢以金啗潏且致書請降于高駢求保奏駢誘致之及潏死巢勢復張鄱陽民彭璋餘干民余鐸共起義兵禦之巢賊遁走

中和二年壬寅撫人危全諷遣將黃澄據有饒州舊志

昭宗乾寧元年甲寅淮南節度使楊行密取饒州

鄱陽縣志 卷之十四 武事 七

昭宣帝天祐昭宗舊號三年丙寅江西觀察使鍾匡時據饒州

舊志

五代

唐天祐六年已巳唐亡于四年晉岐淮南猶稱唐天祐六年乃梁之開平三年也歙州刺史

陶雅使其子敬昭及都指揮使徐章將兵襲饒信饒州

刺史唐寶乘城走豫章書

宋

太宗太平興國六年辛巳江西轉運副使范正辭獲饒州

群盜

鄱陽民甘紹積財巨萬為盜所掠捕及無辜正辭討獲



真盜餘皆釋

靖康四年劉光世屯九江以便宜復德為前軍統制饒州

賊劉文舜圍城德引兵誅之自餘請降不戮一人王德傳

高宗建炎四年庚戌除呂頤浩江東安撫大使兼知池州

駐軍鄱陽呂頤浩傳

紹興元年辛亥賊帥張琪自徽犯饒有五萬眾呂頤浩自

左蠡班師命其將閻臯姚端崔邦弼列陣以待琪犯臯

軍臯力戰端邦弼兩軍夾擊大破之江西大志

孝宗乾道四年戊子夏五月饒飢民哨聚遣官措置賑濟

宋宏簡錄

鄱陽縣志

卷之十四

武事

八

理宗開慶元年己未秋八月蒙古自黃州渡江冬十月改

趙葵江東西宣撫加益國公節制調遣饒信等七州官

軍民兵以禦之趙葵傳

恭帝德祐元年乙亥元至元十二年二月壬戌元兵徇饒州謝枋得

迎戰不利通判萬道同以城降知州事唐震故相江萬

里死之乙丑張世傑復饒州邑人常福生尋以城降舊志

時元兵陷饒州設利陽鎮秋方登代之府志

按張世傑將兵便道取饒州丙寅文天祥起兵勤王三

月趣呂文福入衛便道復取饒州其將謝元王海李旺

袁恩呂再興戰死文福趣饒州殺使者入江州



唐震傳云恭帝立起知饒州饒兵止千八百元軍略地震發民城守昧爽出治兵中夜不寐兵使來索欵狀通判萬道同偕寓士謀陰斂白金牛酒備降禮震叱去之民李希聖謀出降械寘于獄城中感其義共殺使者明年德祐改元二月兵大至都大提舉鄧益遁震出府庫金錢揭于市募人出戰眾懼無能應者北兵登陴遂潰震不屈與兄椿及家人俱死

文天祥傳云德祐元年詔天下勤王天祥上疏乞分天下為四鎮以福建益江東建閩鄱陽責取江東不報

二年丙子元至元十三年五月益王昞即位于福州改元景炎詔以

鄱陽縣志

卷之十四

武事

九

謝枋得為江東制置使進兵饒州

宋史紀事

府志云帝昞

當作昞

景炎初武良弼攻饒州謝枋得舉義

兵章如且黃萬全魯和應之三人俱戰死

兵燹志云正月元兵次饒州秋方登降范相棄城復走

元

世祖至元十六年

己卯二月宋主昞赴海死

遷張宏畧江西宣慰使會

饒州盜起犯都昌宏畧以為饒雖屬江東

時屬江東建康道

與

南康止隔一湖此寇不滅則吾境必有相煽而起者乃

使人直擣巢穴生縛賊酋磔于市餘黨潰散下令曰不

操兵者皆為平民餘無所問

元史張宏畧傳



二十三年 丙戌 移明威將軍鎮饒州安仁劇賊蔡福一叛

秉節與有司會兵討之擒福一餘黨悉平 齊秉節傳

順帝至正十二年 壬辰 春三月徐壽輝 蘄州人僭號天完 偽將項

普畧 郡邑志俱載普壽 陷饒州執總管魏中立不屈死之 元史紀事

亦憐真班傳云十二年移江西行省左丞相妖寇鄒普

勝由蘄黃陷饒州

府志云餘干土人吳宏據守饒州分立鄉寨各守地方一時民稍倚之

十三年 癸巳 夏五月江西左丞亦憐真班江浙左丞老老

取道自信州元帥韓邦彥哈迷取道由徽州浮梁同復

鄱陽縣志 卷之十四 武事 十

饒州蘄黃賊聞風皆奔潰 豫章書

府志云鄱陽義士胡振祖為向道吳宏率眾降旋苦其殺戮復叛之

按府志舊志皆載元平章三旦八元帥韓邦彥復饒州

與豫章書異

十五年 乙未 冬十一月賊陷饒州路 豫章書

舊志云十五年十一月偽漢陳友諒遣花指揮陷饒州奪復之

十八年 戊戌 偽彭翼以吳宏守饒州陳友諒殺翼授宏平

章守餘干 府志



二十年庚子夏五月明兵取信州路秋七月徐壽輝舊將

浮梁院判于光左丞余椿擊走偽漢將辛同知取饒州

以城來降命鄧愈往鎮之饒濱鄱陽湖友諒數遣舟師

來攻愈與光連營拒之明史紀事

二十一年辛丑明大帥王思義克鄱陽之利陽鎮擒賊首

楊文友戮之遂會僉院鄧愈兵于三洞源義取浮梁豫章書

二十三年癸卯秋八月明兵與偽漢兵大戰於鄱陽湖陳

友諒敗績而死元史本紀

明史紀事云二月偽漢太尉張定邊陷饒州于光走還

鄱陽縣志 卷之十四 武事

四月陳友諒忿其疆場日蹙大作舟艦高數丈飾以丹

漆上下三級級置走馬棚下設板房為蔽置艫數十其

中上下人語不相聞艫箱皆裹以鐵自謂必勝載其家

屬百官空國而來兵號六十萬攻南昌壬戌薄城下諸

將分門拒守圍攻凡八十有五守益堅七月癸酉太

祖自將兵救洪都徐達常遇春亦自廬州還太祖親督

諸將會師禡纛于龍江舟師凡二十萬癸未進次湖口

先遣指揮戴德以一軍屯於涇江口復以一軍屯南湖

嘴以遏友諒歸師又遣人調信州兵守武陽渡防其奔

逸丙戌友諒聞太祖至解圍東出鄱湖逆戰太祖率諸



將由松門入鄱陽湖丁亥遇於康郎山友諒列巨舟當我師太祖見之謂諸將曰彼巨舟首尾連接不利進退可破也乃命舟師爲二十隊火器刀弩以次而列戒諸將近寇舟先發火器次弓弩及其舟則短兵擊之戊子徐達常遇春廖永忠等進兵搏戰達身先諸將擊敗其前鋒殺千五百人獲一巨舟而還軍聲大振俞通海復乘風發火礮焚寇舟二十餘艘殺溺死者甚眾徐達等搏戰不已火延及達舟敵乘之達撲火更戰太祖亟遣舟援達友諒驍將張定邊奮前犯太祖舟舟膠於沙漠兵匝焉程國勝劍叱之與陳兆先大奮擊牙將韓成進

曰古人殺身以成仁吾不敢愛其死乃服上冠袍對敵自投水中敵信之攻少緩宋貴陳兆先俱戰死常遇春從旁射中定邊定邊舟始却俞通海來援舟驟進水湧太祖舟遂脫通海與廖永忠以飛舸追定邊定邊走身被百餘矢退去會日暮太祖鳴鉦集諸將申約束恐張士誠乘虛入寇命徐達回守建康己丑太祖復親布陣與友諒戰友諒悉巨舟連鎖爲陣旌旗樓櫓望之如山我舟小仰攻多却太祖親麾之不前右師少却立命斬隊長十餘人猶不止郭興進曰非人不用命舟小大不敵也臣以爲非火攻不可太祖然之命常遇春等分調



漁舟載荻葦置火藥其中至晡時東北風起命以七舟束草爲人飾以甲冑持兵戟若鬪敵狀令敢死士操之備走舸于後將迫敵舟乘風縱火風急火烈須臾抵敵舟焚水寨數百艘燔焰漲水湖水盡赤死者大半友諒弟友仁友貴及其平章陳普畧等皆焚死我師乘之又斬二千餘級友仁者卽所謂武王也眇一目有智數梟勇善戰至是友諒爲之喪氣普畧卽新開陳也是日張志雄舟檣折爲敵所覺以數舟攢兵鈎刺之志雄窘迫自剄丁普郎余昶陳弼徐公輔皆戰死普郎身被十餘鎗首脫猶植立舟中不仆持兵若戰狀時太祖所乘舟

檣白友諒覺欲併力來攻庚寅夜令諸船盡白其檣且莫能辨敵益駭辛卯復率眾大戰自辰至巳不解時劉基侍忽躍起大呼太祖亦驚起回顧但見基雙手揮之曰難星過急更舟太祖如言入他舟坐未定舊所御舟以礮碎矣友諒乘高見舟碎喜甚俄太祖麾舟更進皆失色廖永忠俞通海汪興祖趙庸以六舟深入敵聯大艦拒戰蔽之舟若沒有頃六舟旋繞漢軍而出勢如游龍諸將見之勇氣百倍呼聲動天地波濤起立日爲之晦時漢舟大我師還攻之殺其卒殆盡而操舟者猶不知呼號搖櫓如故已而焚其舟皆死至午敵兵大敗棄



旗鼓器仗浮蔽湖面通海等還太祖勞之曰今日之捷諸君之力也友諒戰不利欲退保鞋山我師先至嬰丁口橫截湖面邀友諒不得出乃斂舟自守不敢更戰是日移舟泊柴棚去敵五里許諸將欲退師少休士卒太祖曰兩軍相持先退非計也俞通海以湖水淺請移舟扼江上流劉基亦密言當移軍湖口期金木相犯日決勝太祖從之時水路狹隘舟不得並進恐爲敵所乘至夜令船置一燈相隨渡淺比明已盡渡乃泊于左蠡友諒亦移舟出泊緒磯相持者三日初友諒戰不利右金吾曰今戰不勝出湖實難莫若焚舟登陸直趨湖南謀爲再舉左金吾曰今雖不利我師猶多戮力一戰勝負未可知何至自焚以示弱萬一舍舟登陸彼以步騎躡我後進不及前退無所據矣友諒猶豫不能決至是亡失多乃曰右金吾言是也左金吾聞之懼來降右金吾亦率所部來歸友諒兵益衰太祖旣駐師彭蠡移書誚之友諒得書怒留使者不遣盡殺所獲戰士太祖聞之命悉出所俘友諒軍視其傷者賜藥療之皆遣還下令曰但獲彼軍皆勿殺又令祭其弟姪及將士戰死者師出湖口命遇春永忠諸將統舟師橫截之又命一軍立柵于岸控湖口旬有五日夜友諒不敢出復移書與之友



諒忿恚不答太祖與博士夏煜等日草檄賦詩意氣彌壯友諒食盡掠糧于南昌朱文正遣人燔其舟勢益困時我師水陸結營列柵江南北岸置火舟火筏中流戒嚴以俟八月壬戌友諒計窮冒死突出繞江下流欲由禁江遁回太祖麾諸將追擊以火舟火筏衝之敵舟散走追奔數十里自辰至酉戰不解至涇江口涇江之兵復擊之張鐵冠大笑賀曰友諒死矣未幾有降卒來奔言友諒在別舸中流矢貫睛及顛而死諸軍聞之大呼喜躍益爭奮擒其太子善見明日平章陳榮等悉舟師來降得士卒五萬餘人張定邊乘夜以小舟載友諒屍

鄱陽縣志

卷之十四

武事

十五

及其子理奔還武昌復立理爲帝改元德壽

舊志云二十三年明太祖次康山吳宏以兵歸之仍以宏守饒州與陳友諒大戰鄱湖水盡赤御黃龍舟幸鄱陽江城樓親書城隍神祀之及諭守臣父老

明

太祖洪武元年

戊申

冬逋寇方丑仁自閩犯饒州知府陶

安總制宋炳堅守三日江西援至麾兵出東北二門合擊斬獲無算

武宗八年

癸酉

江西賊徐九齡嘯聚建昌縣之醴源出沒

江湖鄱陽九江被其毒御史俞諫督討之

江西大志



九年甲戌十月宸濠招鄱陽賊首楊子喬統賊徒楊清等

肆行劫掠明史紀事

十三年戊寅江西大水宸濠素蓄賊凌十一吳十三等出

沒鄱陽湖孫燧謀捕之孫燧傳

世宗嘉靖元年壬午夏五月復設兵備副使於饒州豫章書

四十五年丙寅安插兩浙遊兵於饒州浙以征倭募兵事

寧無所歸朝議散之鄰境江西耿文光領一千駐饒築

驚難制五月廩給愆期執妙果寺耕牛屠以歆盟城門

不啓民思逃竄副使于錦出帑銀安撫廉得首惡周田

等置獄餘無問乃定嗣後守臣漸以計遣去

鄱陽縣志

卷之十四

武事

十六

熹宗天啓元年辛酉福建巡撫遣同知關某督工造戰船

于饒州

懷宗崇禎十六年癸未水帥副將閩人鄭鴻達率兵造戰

船于饒州經歲乃行

三月十六日黔兵住南天寺二十四日大吉張姓民逐黔

兵

按黔兵自餘干縣陸路到饒州在南天寺居住約六七

百人督兵都閩姜姓鄱陽縣用水手一名送備猪肉鹽

魚賞兵除彼長行馬外計縣馬二十七匹每匹恤馬錢

一千文府城十七日關城十八日開城初黔兵訛言取



道德興忽趨饒州二十四日晚至大吉張姓離樂平五十餘里愈恣擄掠百姓憤極聚眾格逐各鄉聞風持竿驅殺黔兵趨樂平

十七年甲申江北潰兵為寇流入鄱陽境守備孫之烈率

兵禦之戰于上藍敗績死焉復至童子渡守備張佚其名

與戰亦死焉

孫之烈揚州人武科甲能詩好士及戰死人多哀之會國亡不獲議恤亦所遭之不幸歟原跋

皇清

世祖章皇帝順治二年乙酉秋

鄱陽縣志

卷之十四

武事

十七

王師下江右郡人以城歸附故淮世子朱由桂焚宮殿遁入閩莫知所終

五年戊子春正月金聲桓王得仁據南昌反饒州守將潘

永禧以城應之

六年己丑二月副將穆生輝復饒州

聖祖仁皇帝康熙十有三年甲寅春三月耿逆告警秋七月城

守叅將程鳳反謹按饒州事考七月城守叅將程鳳反

先是耿逆反于閩中廣信守將叛降鳳部下謀以城應

之未幾萬年失守訛言閩寇即日臨城七月十五夜漏

下三刻鳳部目兵十九人露刃劫鳳以叛比明城外無



應遂遁把總陳虎馳浮梁勒守備王憲從逆縛知縣王  
臨元奪印劫庫臨元自縊程鳳逃至浮梁北麻村密招  
集積盜九月閩賊數萬屯景德鎮掠物一空十一月王  
憲遁走賊殺之于婺源界偽總兵宋啓運駐景德鎮是  
月巴額二將軍統滿漢官兵自徽擊偽羅都督轉克樂  
平賊逆遂復饒州

十四年乙卯春三月巴額二將軍帥師征廣信留夸蘭大  
駐防賊諜知兵少來寇前鋒賊遇夸蘭大遊兵數十騎  
于城東五里方接戰適有數騎自十七里北原馳出截  
後賊腹背受敵大奔追至磨刀石居民亦奮白挺逐之

鄱陽縣志

卷之十四

武事

十八

入河溺死者無算生擒十餘人方會訊于康王廟賊黨  
偽副將葉某等自他道薄靈芝門緣堞而上守城者擊  
之逐而復升城遂陷時城守叅將趙登舉署道事同知  
范文英知府郭萬國等方奮勇逆戰於城北朝天門賊  
布竹木器於道馬不能馳復從缺垣空宅中伏烏鎗夾  
擊勢不能支遂俱遇害署鄱陽縣事縣丞陸之蕃石門  
巡司翁鳳翥萬年知縣王萬鑑亦死亂軍中五月將軍  
希爾根自省來援賊遁復饒州程鳳退據德興病死山  
中六月希將軍征浮梁遇賊陳虎於界牌鋪斬殺之九  
月偽將軍黃尙志復據餘干自稱知縣事

饒州  
事考



十五年 丙辰 夏五月饒州都督高登科師入浮境自查村

連營理村賊將陳虎分兵來犯伏兵四起生擒虎裂之以狗賊勢遂衰

十六年 丁巳 春三月饒鎮高登科恢復德興縣餘賊仍盤踞山谷

十八年 己未 春正月鎮標遊擊佟養正率兵及江南兩浙兵會勦擒之七邑悉平



武功附

明

江春字九齡家鄱之新城鄉都昌其故居也讀書通大義善武事至正末倡義兵保鄉閭壬辰徐壽輝遣項普畧陷饒署春爲左丞屯都昌香溪壽輝爲陳友諒所殺春思報之遂歸明太祖除權江南行省左丞隨明太祖克江州豫章諸郡解安豐圍敗友諒於康郎山論功授同知振武衛親軍指揮使司從諸將下泰通湖蘇浙西諸州擒張士誠定河南郡以功拜懷遠大將軍預降幽薊平鴈門雲中走大同將竹真遂守禦大同同知大同衛鄱陽縣志

卷之十四

武事

三

世襲遷同知朔州長淮汀州等衛廣東盜起檄春平之功多回衛卒歸葬新城鄉無嗣

吳宏字德廣元至正間項普畧陷饒州宏授命團結左丞老老等復饒宏率眾降尋忿其欲殺降者叛去屢敗老老兵乘勝有饒信屬地稱行省叅知政事鎮饒州會明太祖追陳友諒駐兵江州宏謂幕下曰番君初仕秦旣而仕楚仕漢史臣竟稱以忠吾志決矣遂遣部下趙克俊奉圖表來歸仍鎮饒州太祖幸饒嘉宏保障功從鄧院判取撫州南昌明年從取武昌論功拜中書左丞以弟吳義吳光失軍期宏以官贖罪降指揮僉事叅贊徐



達狗趙擊燕克代三年謫戍秦州卒宏性孝友自起兵掠地愛民惜士不贖貨狎色博涉百家詩文有跌宕氣入朝悉焚屯聚冊籍鄉人德之

徐便字宗文鳳岡人幼嗜詩書習騎射元末鄉兵起推便爲長便從于光歸明多謀畫洪武四年授武畧將軍定遼衛副千戶尋委攝遼陽事議者以海州牛家莊爲要路宜立寨貯餉便度不可議遂寢已而敵果大掠去眾始服其識焉會敵犯金川調便至蓋牟迎敵度道隘因積冰成壘斷歸路敵果大困大有俘獲及攻破他處堡寨甚多累功擢明威將軍海州衛指揮僉事繼掌遼海

鄱陽縣志

卷之十四

武事

三

衛事予世襲復陞遼東都指揮僉事移鎮廣寧復鎮開原永樂八年卒詔予傳歸里葬於鄱便練達勇敢詰戎之暇手不釋卷好詩歌每行次輒賦以紀事子琦襲以功陞指揮同知與指揮李通開築廣寧右屯衛城載皇明世錄宣德八年琦老子縉紳俱歿於陣幼子綏無嗣以親姪榮承繼襲職景泰元年殺寇有功二年陞本衛都指揮使成化十年致仕子鎮襲職十六年病故子澄仍襲本衛指揮使

汪用字克用以膂力自負隨于光歸明後授昭信校尉定遼衛百戶征勦每著奇功陞武毅將軍海州衛副千戶



進武畧將軍

俞先字仁載魁岸有膽畧于光署爲元帥同劉炳奏表金陵從克黃梅瑞昌諸縣敗陳友諒八陣軍馬授鷹揚衛百戶陞武畧將軍定遼衛副千戶調守牛家庄敵犯城禦之沒于陣贈明威將軍指揮僉事

俞韶字九成歸明後同于光鎮饒下豫章武昌鎮禦大同韶皆與有功擢武畧將軍定遼衛副千戶調征開原沒于陣

方祿明洪武四年以于光舊部曲官百戶階昭信校尉累以戰功進承信校尉卒子誠嗣改官定遼後衛

鄱陽縣志

卷之十四

武事

三

俞復亨幼有才畧初坐事戍遼東明成祖靖內難以功授承信校尉旗手衛百戶遷武畧將軍副千戶再陞武德將軍出入禁闕恩遇日隆進明威將軍同知錦衣衛親軍指揮使司

皇清

洪渙字寧波康熙丙戌武進士任甘肅鎮番衛掌印守備兼管屯事鎮番古姑臧地僻在邊陲庚子歲歉渙竭力捐賑全活無算雍正癸卯涼永番變渙團練鄉兵千餘爲戰守計尋奉委運糧天王嶺木毛山諸營馳驅沙漠不解鞍甲者數月又安插番目折花凌柱沙碼班碼及



胡圖圖等共六百餘戶男女數千口教之耕種悉爲良民甲辰鎮番改縣因卸衛事復督理柳林湖水利築壩開溝長數十里分列五渠以備旱潦招募墾闢給牛種器械三載得熟地三萬餘畝事竣候補以疾歿于鎮番補探府志二條

宋

楊在軒逸其名通判某州臨難死節孫元慨先志不表暴於世著忠史一卷哀列夏商以來至宋而止得八百餘人泰定初挾其書詣京師上之

明

鄱陽縣志

卷之十四

武事

三

張穀正利陽鎮人有氣節壬辰亂集義兵保守一方



義勇附

隋

林士宏饒州鄱陽人隋季與鄉人操師乞同起師乞自號元興王大業十三年據豫章以士宏為大將軍隋遣劉子翊射殺師乞士宏收其眾戰彭蠡子翊敗死士宏據虔州自號南粵王俄號楚稱皇帝任其黨王戎為司空臨川廬陵南康宜春豪傑皆殺隋守令以附北盡九江南番禺悉有之後蕭銑以舟師破豫章士宏獨有南昌虔循潮之地銑敗復振武德五年王戎獻南昌地士宏遁保安城袁人相聚應之為張善安所察以兵赴討會

鄱陽縣志

卷之十四

武事

二

士宏死其黨乃散

唐書

按士宏舊列備志義主尊王白中丞通志從唐書補入人物志而比之李密王世充竊謂儼尚非倫趙佗李昇庶乎近之但享國未久耳然崛起一方得保首領而紫陽綱目無貶辭視項羽陳友諒有加焉

袁贇隋大業間兵亂倡義聚郭內居民相保守操師乞自

新昌來攻城贇不支出居

童敏故城與張善安戰斬獲多武德初授懷州刺史

唐

竇贇同弟襄聚義兵拒黃巢保饒歙二州以功官御史大

夫與金日安皆廟食



宋

周樸字吉甫美髯有大志初從學於黃應博又從學於張采采奇其才處之家塾樸以其知己事之不去時盜起江湖閬州將以采知兵使督州兵討之盜有張家僮率眾掠邑里采將攻之而賊先發遂遇害樸走告州將曰張提督爲賊所殺諸子皆幼吾當爲師復讐禮報讐不書於士則有罪不敢不告也州將義之授以兵兵寡議者勸募兵樸曰我募而眾彼益眾矣不若出其不意亟擊之卽擣賊所賊窮以金擲地兵爭取金賊脫去樸立斬數人以徇慷慨流涕誓不與賊俱生眾感動願効

鄱陽縣志

卷之十四

武事

三五

死力攻一寨破之餘寨皆走乘勝追擊斬首數千生擒僮賊斬之俎其心肺爲文祭其師時境內賊柵數十悉平元兵至州將唐震死之眾勸樸降太守可得樸曰吾爲師復讐而已他豈所望哉卽日散遣所部隱居不復言功名景定元年八月沐浴別親友索歷擇日端坐而卒長子瞰元至正進士應奉翰林同知制誥兼國史編修

元

胡振祖字振卿元至正壬辰兵起人多附之振祖獨毅然樹義旗糾鄉民爲保障計明年平章三旦八以官軍駐



饒元帥韓邦彥為前鋒振祖往迎為鄉導遂復饒城以便宜假振祖同知浮梁縣又明年復假判饒斬兵再至元院判哈迷遁退保德興振祖率兵轉戰遇歛寇汪童眾數萬乃營大游山拒之相持兼旬屢戰不利馬蹶被擒誘以降振祖曰吾為國以義保民身可死膝不可屈因給寇置酒連酌至微酣奪戟刺殺數人而死時丙申九月也子節字叔儀洪武間舉賢才官慶元知縣力請名公表揚父義母節周伯琦為書大雅堂宋景濂為之記何椒邱序費鵝湖賦見藝文會孫韶另有傳按新安程黃墩辨汪童本作同婺源人元季起義兵捍州里厯官淮南行省左丞以忠勇聞為張士誠所害先是丙申九

鄱陽縣志

卷之十四

武事

三

月同率眾二萬破鳳游山諸砦直抵浮梁將乘勝取饒城主將忌其成功乃退而振祖傳云云蓋鄱歛兩軍倉卒相遇互疑為陳友諒黨而殘之甚矣其為不可贖之憾也劉司空原跋

劉明字衮明生而英偉好讀書有鄉里譽元季壬辰斬兵寇饒明糾集鄉民以義勇相保守官軍東來為嚮導克復郡邑總兵三旦八屢加褒賞運糧開道遇賊力戰錄功授浮梁州判官從征信陽病亟諭左右曰所恨者殘寇未滅不能盡忠于國耳言訖而逝翰林李燦銘其墓

明

劉勳一字彥輔元季兵起倡義旗至正辛丑隨守將于光以兵從太祖征九江斬黃克臺明定蘭秀山鎮閩中移



鎮潮陽未幾卒

屈任字濟民元末紅巾倡亂任與弟直中暨同里操守義輩糾集鄉民保障寇至挺身抗鋒鏑力屈被擒賊帥迫之從任曰棄母之養從汝強賊天地神祇所不容賊帥曰義士也釋之

皇清

童明道及子蘭生俱明文學金聲桓之變文子起兵明道被獲蘭生益勵志圖報父仇招之降不聽卒慷慨受刃死同時文學廉質字元子明海門合械之子有勇力亦起兵戰死于萬年其妻包氏投井死另見烈婦傳以上黃志

鄱陽縣志

卷之十四

武事

三

王建極字君用邑庠生北關五里堡人順治五年戊子五月初一日邑遭流寇賊劫其家勒受偽劄建極罵曰爾賊徒耳乃欲吾臣事乎賊怒殺之於芝山白兔嶺里人哀之葬老君嶺呼義士墓

